



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

Meghalaya nung Bangladesh nung 116 putetogo: Home Minister

T20 World Cup sülen captain mapa toktsütsü: Kohli

VOL. XVIII NO. 335 (ADOK 335) DIMAPUR

ROGONÜ (FRIDAY)

RONGJUI (SEPTEMBER) 17, 2021

₹ 5.00

## Dimapur nung September 30 tashi lockdown atsülanger

**Dimapur, Rongjui/Sept. 16 (TYO):** Tang lockdown mera balala benoka aliba ya Dimapur district nung September 30 tashi alitsü saka tesalaba kar alitsü, ta Deputy Commissioner, Dimapur, Rajesh Soundararajan, IAS ajanga Brehostibarnü sangdong ka nung metetdaksü.

Aonsotsü, sho/ango, mamatzü, bakery, local grocery store amala osettem ayokba dokan aser business establishment, LPG aser E-commerce amala service tem anogoshi anepdang 6:00 ako nungi aonung 8:00 ako tashi lapoktsü, ta sangdong ajanga ashi.

Danga osettsüset dak sendakba dokan aser business establishment aser ano New Market, Hongkong Market aser Hazi Park nung aliba dokan ajunga Hombar, Mongulbar, Brehostibar, Hokolbar aser Honibar anogotem anepdang 6:00 ako nungi aonung 8:00 ako tashi lapoktsü melar.

Dimapur nung night curfew ya aonung 9:00 ako nungi anepdang 4:00 ako tashi alitsü.

Sorkar office tem nung mapa inyaker noklang shilem arutsü saka COVID-19 tashidak nungi jenbutsi tapet meratem agitsüla, office-i arurtem vaccine mozü agitsüla/COVID-19 tashidak tensangtsüla, ta ashi.

District kübok yimdak-yimtsüngtem nung akhi ama

class ya Class V nungi Class X tashi attendance shilem 50 tashi October 1, 2021 nü nungi lapoktsü aser Home Department ajanga sangdongba SOP ajak amshitsüla.

District kübok urban area nung aliba school ajunga Class V nungi Class X tashi azünger kaketshir atema akhi ama class October 1, 2021 nungi tenzüksü, saka attendance shilem 50 dang asütsüla aser Home Department ajanga sangdongba SOP ajak amshitsü, ta ashi.

July-December 2021 session atema Polytechnics pur offline class agitsü melatsü saka taoba mapang college aser technical institution tem lapoka akhi ama class agitsü osangtem mapang balala nung sangdongba nung shia aliba SOP sülen anidaktsüla, ta sangdong ajanga ashi.

Swimming pools aser cinema tem lapoktsü melar saka capacity shilem 50 dang melar aser Home Department ajanga sangdongba SOP tem shidak amshitsü aser COVID-19 tashidak nungi jenbutsi alitsü meratem amshitsüla.

Item tetuyuba nung aibelenba kar danga lira, itemji Indian Penal Code indang Section 188 aser Disaster Management Act, 2005 kübok aibelenba ama züngshitsü aser tapet temerenshi agütsütsü, ta Deputy Commissioner, Dimapur sangdong ajanga metetdaksü.

## Legislature tem shisadokden senden ka amentsü

**Kohima, Rongjui/Sept. 16 (TYO):** Honibar (18.09.2021) anepdang 11:00 ako nungi tenzuka Chief Minister indang Residential Complex State Banquet Hall, Kohima nung Upper House aser Lower House anaprongla nungi MPs densema NDPP, BJP, NPF aser Independent nungi legislature tem shisadokden senden ka

agitsü aser iba sülen telok chiyongba mapang alitsü, ta Minister, Parliamentary Affairs, Neiba Kronu-i sangdong ka nung metetdaksü.

Anungji iba senden nung legislature aser House anaprongla nungi MPs ajak medema aruagi adentsü asoshi mepishir, ta sangdong ajangasa ashi.

## Tanü Union Minister Rajeev Chandrasekhar-i Nagaland semdangtsü

**Dimapur, Rongjui/Sept. 16 (TYO):** Ministry of Electronics & Information Technology, Skill Development and Entrepreneurship nung Union Minister of State, Rajeev Chandrasekhar-i September 17, 2021 nungi tenzuka ananü Nagaland semdangtsü sentong lir, aser iba mapang pai Kohima aser Dimapur semdangtsü.

nung oa Ato Kilonser Narendra Modi asoba anongomung nüngtem nung sentong ka nung adentsü.

Pai Chief Minister Neiphiu Rio ajurutsü aser nikongdang osangbener senden ka ayongzuka agitsü aser sobaliba sentong ka nung adentsü.

Rajeev Chandrasekhar ya tananububa nung Dimapur-i alutsü aser Skill Upgradation Centre for Tribal Women (Under SANKALP) aser Handicraft Industry Cluster (HC-SSC) semdangtsü.

Minister Chandrasekhar ya nikongdang Dimapur Airport nungi Delhi-i aotsü sentong lir.

## State tesem ajungalen ghonda 12 shishilempaba tesemtem shibang



Kohima

Mokokchung

**Dimapur, Rongjui/Sept. 16 (TYO):** State tesem ajunga nung ghonda 12 mokdangtsü atongzükba ama Kohima nunga September 16, 2021 anepdang 6:00 ako nungi nikongdang 6:00 ako tashi shishilempaba tesem ajunga shibang aser osettsüset abenba garitem mejaja.

Naga political groups aser state sorkar indang agency balalai saru tabu balala meshiba anema Dimapur Chamber of Commerce and Industry (DCCI) ajanga September 16, 2021 nü anepdang 6:00 ako nungi tenzuka ghonda 12 shishilempaba inyakyim kecha malitsü sangdongba busema Confederation of Nagaland Chamber of Commerce and Industry (CNCCI) ajanga ayongzükba ama Kohima Chamber of Commerce & Industry (KCCI) ajanga state yimtiba nunga shishilempaba tesem ajunga shibanga liasü.

Iba tenokdangba yagi shishilempaba inyakyim nung kisung kongshi aser sorkar office, kaket reju aser gari senzuba akhi ama liasü.

Shishilempaba tesemtem shibanga sentong takon nua agiogo aser timtem kecha meliasü, ta KCCI general secretary Akhrieu Mor-i sangdong ka ajanga ashi. KCCI telemtetba nung anidakba atema shishilempar ajunga dang pelar, ta laisa ashi.

Naga political groups aser sorkar meyong agency balalai ozüing alema tax meshiba atema shishilempartemi state tesem ajunga nung Brehostibarnü ghonda 12 shishilempaba tesemtem shibangtsü ayongzükba ama Dimapur nunga inyaker aser osettsüset abenba garitem kata lenmang nung

mejajai liasü.

Confederation of Nagaland Chamber of Commerce and Industry (CNCCI) aser Dimapur Chamber of Commerce and Industry (DCCI) ajanga ayongzükba ama iba mokdang ya anepdang 6:00 ako nungi tenzuka liasü.

Iba mokdang ya Kohima, Dimapur aser Mokokchung ama yimti tulutem kisung nung masü saka Tuli, Jalukie aser Pftusero ama jila tilatem nunga liasü.

Iba mokdang tajungtiba nung timtem majurui süyidaksütsü mechi shishilempaba tentet temi tongtipang tesemtem nung volunteers yoka liasü aser mepetmetsü aser timtem kecha meliasü, ta osang ajanga ashi.

Dimapur nunga iba mokdang yagi sorkar office, bank, kaket reju inyakyim mesüra sorkar aser nija garitem senzuba nung timtem magütsü.

Naga political group balalai tax tabu aika meshiba teblemstü tekeratiba nung angateteptsü aser GTS regime küboki aiba oset nung lokti tentet balalai saru meshiba agientsü atema Chief Secretary nem September 9 nü tezüluba nung agütsüba ama state sorkari temolung süa telangzuba magütsüba ajanga iba mokdang ya ayongzük, ta CNCCI Convenor, Khekugha Muru-i osangbener dang ashi.

Parnokisa SARFAESI (Securitisation and Reconstruction of Financial Assets and Enforcement of Securities Interest) Act, 2002 ya tekeratiba nung mapa kuma inyaksü, municipal, town aser ad-hoc town council tem nung shishilempar telok nungi teshimtet nübu anioktsü atema takhangba agüja liasü.

CNCCI takhangba langzua state sorkari iba mokdang ya agientsü ajungshi aser GTS regime nung aiba oset nung municipal aser town council temi tax mesüra taa meshiba anentsü, ta shia liasü.

Ajidang masü, yimti aser jila balala nung urban local bodies nung administrator temi shishilempar nungi teshimtet nübu anioktsü atema mera agitsü aser shishilempar dak sendakba inyaksangshi nung telemtetba balala agitsü atema advisory committee nung shishilempar shimoktsü shia liasü.

Naga political group balalai tashiyim amshia senotsü meshiba anentsü atema CNCCI ajanga akhangba ama sorkari Dimapur Commissioner of Police dang tekeratiba nung security grid ka amenoktsü aser ozüing alema senotsü saruba mittsü atema tesem balala nung sepaitem yoktsü totuyuba agütsü.

Ajisüaka sorkari langzuba nung temolung masü, CNCCI ajanga state tesem ajunga nung ghonda 12 mokdang, ta Muru-isa ashi.

State sorkar aser par machineries ajanga mapa meinyakba atema anogo ka shishilempaba tesemtem shibangba ya business community temi longkak aiba noklem mezüngbuba alitsü, ta DCCI president, Akashe Zhimomi-i osangbener dang ashi.

Shishilempartemi timtem ajuruba bentetatsü asoshi sorkari tapet mera magira ano maneni mera balala agitsüsa akumtsü, ta pai ashi.

State nung ozüing alema saru tabu balala saruba anema raraba nung lokti tentet balalai shilem agiba atema pelar, ta paisa ashi.

## Nagaland nung COVID-19 agi meneper dang taneptsü angur timba

**Kohima, Rongjui/Sept. 16 (TYO):** Brehostibarnü agi anogo tibuba Nagaland nung COVID-19 tashidak menar dang nungi taneptsü angur timba lir, aser Brehostibarnü iba tashidak nungi nisung 43 taneptsü angur aser nisung 32 dak iba tashidak puteta caseload 30,763 kumogo.

"Tanü positive cases 32 putetba ya Dimapur nung 11, Kohima nung 10, Mokokchung aser Phek nung pongu-ngu aser Wokha nung ka," ta State Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi.

"Tesüiba ghonda 24 tsüingta taneptsü angur nisung 43 ya Dimapur nungi 25, Mokokchung nungi 9, Phek nungi 7 aser Kohima nungi ana alitsü," ta pai ashi.

Anungji tang tashinung State nung COVID-19 tashidak nungi taneptsü angur nisung 28,669 alitsü aser taneptsü anguba rate ya shilem 93.19 nung lir.

Tang state nung active cases 505 lir, aser parnok rongnung nisung 84 dak iba tashidak agi timtem agütsüba sümia lir, nisung 9 tera timtema oxygen inoker lir, nisung 12 kanga sashia kangshia oxygen inoker lir, nisung asem critical nung ICU nung ventilator meinok lir, nisung 9 ventilator inoker lir aser nisung 404 dak iba tashidak agi temang nung timtem

agütsüba mali, ta pai ashi.

Dimapur district nung COVID-19 positive alir nisung ana asüba ajanga state nung iba tashidak keter asür nisung 648 jungogo aser item rongnung nisung 14 bo danga tashidak agi asüba alitsü, ta ashi.

COVID-19 tashidak agi menepa alir nisung 941 tashi danga state temi ogo, ta pai ashi.

Tang tashinung COVID-19 tashidak alitsü südi ta temolung melemtet Nagaland nung sample 353,465 tendangogo. Itemji RT-PCR ajanga 107,593, TrueNat ajanga 80,403 aser Rapid Antigen Test ajanga 165,469 tendangogo, ta Dr. Kikon-i ashi.

(Maneni tapak 2 nung...)

### Advisor K.T. Sukhalu-i Akuluto nung GHSS tasenba semzüksü



**Dimapur, Rongjui/Sept. 16 (TYO):** Akuluto nung tang tasen upgrade asüba Government Higher Secondary School ya Kazheto Kinimi, Advisor, NSDMA & CAWD lia Advisor, School Education K.T. Sukhalu-i semzükja liasü.

Director, School Education, Wonthungo Tsopoe-i iba sentong nung o tatsüka jembidang ashiba agi, Akuluto Higher Secondary School nung result tajung angutsü aser lenir tajung adoktsü aser ano kisüzüng tonga shisaliok tajung bener arutsütsü nükjidong nung school ya tuluba kumdahtsü.

Anungji education committee aser tesayurtemi department teimla mesamadaktsütsüla, ta ashi.

Akuluto aser temeket nung aliba yimtsüngtem nung nübürtem mangdang asangsang kumdahtsüba atema Advisor, NSDMA & CAWD, Kazheto Kinimi-i Chief Minister Neiphiu Rio aser talisa Advisor K.T. Sukhalu dang pelaba lemsatapa liasü.

Pai par constituency nung aliba nübürtem dang yimtenren

tsütsü tangatetba balala aliba yutsür ka kuma lungjemer pa nungittsü ayongzüka liasü.

Advisor K.T. Sukhalu-i iba school semzükja jembiba mapang Chief Minister Neiphiu Rio-i Government High School ti tashi Government Higher Secondary School jenjangi ajungkettsüba atema pelaba shisem.

Sorkar indang nükjidong tulutibaji kaketshir ajunga nem shisaliok tajung aser angati agütsütsü ya lir, anungji tsüraburtemi nunnganga mebilemi tanurtem government school-i yoktsüla, ta pai ashi.

Paisa lokti tentet balala dang tesayurtem mapang tajung aser tamajung nung nungittsü ayongzüka, anungjidang parnoki bendanga agütsür tanurtem dang nendaka sayutsü, ta ashi.

School nung result tajung adokdahtsütsü atema school education committee den yariteptsüla, kechiaser result tajung madokba school tem department-i ano high school kumdahtsütsü, ta Advisor-i ashi.

Tanü putu aser tensa ya shisaliok aser tashi-temeteter

putu ka lir, kong tashi amshitsü menüngdak, anungji tsüraburtemi pei chirtem tarutsü asoshi melemettsüla, ta ashi.

Tesayurtem danga tanurtem dang bendanga agütsür ochishia sayutsü ajungshi, kechiaser kaketshir tamendak dak tashi meitra tarutsü nung takok mangutsü, ta Advisor-i ashi.

Kasa sentong nung Advisor-i nübürtem dang menüngdakba nung COVID-19 mozü indang mashi mangateti ajak mozü agitsü ajungshia liasü.

Sorkari agütsüba SOP nung nübürtemi manidakra tashidak wara tali tamajungba akumtsü, ta pai ashi.

Iba sentong nung Kheghoto Sema, GT GHS Akuluto aser Jasper Achumi na menden liasü. GHS Akuluto kaketshir temi temeja ken ka aser Sumi tetsü-tebou ken ka aten.

Hotovi Chishi GB, President AAGBA ajanga sentong nung adener pela agizük aser Kughaho Assumi, President VAAGBA aser Wonthungo Tsopoe, Director, School Education nungeria o jembia liasü.

### Nagaland nung aluyimer atema technology nüngdaker: APC

**Dimapur, Rongjui/Sept. 16 (TYO):** Agriculture Production Commissioner, Government of Nagaland indang Office chamber nung video conference senden ka September 16, 2021 nü Vivek Aggarwal, IAS, Additional Secretary (Digital Agriculture), Ministry of Agriculture & Farmers Welfare mendenpuba sür mena liasü. Iba senden ya National e-Governance plan (NeGPA)/Digital Mission Agriculture (DAM) for 2021-22 kübok Nagaland sorkari benoka aliba "Soil & Water Resource Management and Meteorological Analysis and Forecasting System Using Remote Sensing, GIS Mapping, Drone and Emerging Technologies" project atema alitsü.

Aluyimer nem advisory services balala agütsütsü atema Union Ministry ajanga September 15, 2021 nü sayaba digital MoU ka frim pongu den zülutepba atema Agriculture Production

Commisioner, Y. Kikheto Sema, IAS ajanga tenüngsang agüja liasü.

Aluyimer atema alateta mapa inyakba atema pai talisa Additional Secretary (Digital Agriculture) aser team Digital nem tenüngsang agütsü.

Pai project indang tongmelang agi rasaa ashi aser district ajunga nung Soil Testing Labs asr block 74 prong nung mini labs amenoktsü atema Ministry ajanga sanction asüba asoshia pelaba metetdaksü.

State nung aluyimertem tang tashi akhi yimya nung alu ayimer aser yangji tanü-asüng yanglutetba aser putitetba technology meyokteper inyakra state nung aluyimba tsütsü renloktsü, ta pai ashi.

Kanga kera tzi-mopung melenshia aoba, talisa tziunglu aruba yimya melenba aser temperature melenba ajanga tziungsarusa tia kati yoker aser kodanga majangshidangba mesen balala pokteter, ta Sema-i ashi.

Ajungji tensa den apet technology tasentem amshitsü kanga tongtipang lir, talisa tziungsang-mopung takzüba oset, aluyimer nem shisa agütsüba services aser ano drone amala amshitsü nüngdak kumogo, ta ashi.

Department of Soil & Water Conservation aser Nagaland GIS and Remote sensing Centre, Government of Nagaland ajanga proposal ya agüja liasü.

Additional Secretary (Digital Agriculture) ajanga tebang agibo iba proposal ya agizük aser Nagaland nungi ketdangsürtem iba project proposal tatem kuma inyaktsü atema Ministry of Agriculture and Farmers Welfare tonga arutsü jaoka liasü.

Iba senden nung Y. Kikheto Sema, IAS, APC Nagaland; K Zhekheto Awomi, Director, Department of Soil & Water Conservation aser ketdangsürtem, aser Mhathung Kithan, Project Director, Nagaland GIS and Remote sensing Centre nungertem dena liasü.

### IMDH, Mokokchung nung special COVID-19 vaccine drive agitsü

**Dimapur, Rongjui/Sept. 16 (TYO):** Arishi küm 18 nungi tema shishilempar/dokan kibur/aonsotsü ayoker/commercial vehicle driver/porters atema special COVID-19 vaccination drive ka IMDH, Mokokchung nung September 19, 2021 nü agitsü, ta Deputy

Commissioner, Mokokchung, Limawabang Jamir-i sangdong ka nung metetdaksü.

Iba sentong ya dose mezüngbuba aser tanabuba atema alitsü aser September 19, 2021 anepdang 10:00 ako nungi tenzüksü, ta sangdong ajanga ashi.

### Police temi samar aliba truck ka ngutet

**Dimapur, Rongjui/Sept. 16 (TYO):** Kistü-jensüba oset abeni September 10, 2021 nü Tuli-i yokba sülen Tata Dumper 10 tyre BS6 vehicle sentsü-Titanium white, chassis No. MAT 802009M3B 03021 Engine No. 7B6A 250006112A 64140467 Body Serial No. BPC4B 2109141 ka den driver Assanath Raha aser Taiber Beg na samaogo, ta September 12, 2021 nü Kasheerabad construction private limited Changtongya to Longleng nungi G. Raghavendra BM ajanga tezüluba nung ashishitep ken o ka police nem agüja liasü.

Iba sülen Munesh Payal IPS DCP-II ajanga Dimapur Police team ya yok aser kasa mapang Longleng Police nungi ASI Limatemjen den UBC Purnungsang na Dimapur-i yoka liasü.

Aonung 7:00 ako meta truck ya ngutet aser iba gari dak sendakba nung temolung melemi bilemba nisung ana, Barpeta, Assam nungi Basir Uddin'er jabaso arishi küm 23 tain MD Atar Ali aser Haque village - Danagushi district, Morigaon, Assam nungi Ainul'er jabaso arishi küm 29 tain MD Moidul Islam pua liasü. Ajisüaka driver ana ya tang tashi jenshia senzür.

Driver ana indang mobile phone ya switch off aser GPS readings nung tena ya Dimapur telungzük nung alitsü südi ta sayua.

Ano maneni September 12, 2021 anepdang 9:00 ako meta DEF Longleng nungi SOT ajanga Santro gari (Regd. No AS 03D 9292) ka Tangha yimtsüng anasa soiter mita bushiba mapang MC Rum (750 ml) bottle 68 nguteta iba gari nung mena alir Edui Ali S/o Zuper Ali P/A- Chutia Bosti, Halwating, Assam aser Assam Phukan S/o Lt. Jyute Phukan P/A Halwating na pua liasü. Iba maparen dak sendakba nung NLTP Act indang Section 44 kübok ken o ka Longleng Police Station nung benoka lir.

Iba osang ya Police station Longleng nung anguba sülen idangjisa ken o bushisüngdangba nung yariteptsü atema DCP Zone-II Dimapur dangi osang yoka liasü.

Cyber Unit Dimapur nem samar aliba driver tsüngsü aputsü osang agütsü aser nikongdang 4:45 ako meta GPS location ajanga samar aliba truck ya anasa aliba Ashok fuel station, Khatkhati, Assam nung puteta liasü.

### Security Forces-i Dimapur nung NSCN (IM) züngsem ka apu



**Dimapur, Rongjui/Sept. 16 (TYO):** Security Forces temi Police den lungjemer general area Super Market, Dimapur nung September 14, 2021 nü operation ka agiba mapang NSCN (IM) züngsem ka pua liasü.

mapang NSCN (IM) züngsem kay a apu aser pa ket nungi 9mm pistol ka den magazine, 9mm pistol indang injang pezü aser sen 1,29,400 nguteta liasü.

Osang tejangja ka nung ajemdaker Security Forces temi State Police den lungjemer operation ka agiba

Pua alisang den pa ket nungi ngutetba osettem ya ano maneni asüngdangyatsü atema East Police Station, Dimapur nem agütsüogo, ta sangdong ka ajanga ashi.

### Nagaland nung COVID-19... (TAPAK 1 NUNGI...)

Nagaland nung Mongulbarnü tashinung nisung 674,498 nem COVID-19 mozü doses 954,644 agütsüogo, ta State Immunization Officer, Dr Ritu Thurr-i ashi.

küm 18 nungi 44 tsüngta nisung 401,755 alitsü, ta pai ashi.

State nung COVID-19 mozü agir alirtem ya frontline nung inyaker nisung 60,907, healthcare nung inyaker nisung 15,993, arishi küm 45 nungi tema nisung 195,843 aser arishi

Nisung 280,146 nem mozü dose tanabuba agüja parnokbo vaccine course tembanga agiogo. Parnok ya frontline nung inyaker nisung 46,435, healthcare nung inyaker nisung 13,102, arishi küm 45 nungi tema nisung 124,785 aser arishi küm 18 nungi 44 tsüngta nisung 95,824 alitsü, ta Dr. Thurr-isa metetdaksü.

## Mizoram nung Myanmar nung ana apu



Assam Rifles sepaitemi Mizoram kubok Lawngtlai district nung prangbong injang bener lia Myanmar nung ana apu yangi noksa nung angur.

**Aizwal, Rongjui/September 16 (Agencies):** Assam Rifles sepaitemi Mizoram kubok Lawngtlai district nung prangbong injang bener lia Myanmar nung ana puogo.

Osang tejangja angazükba sülen Assam Rifles Lunglei Battalion-i, Bodhbarnü Lawngtlai district kubok Zochachua aser Varang yimtsüing na tsüingda Sekul-Lui ayong meita ao.

"Indo-Myanmar arrtsü nung

Laitlang anasa prangbong injang melenteptsü sentong aliba indang osang tejangja angazüka liasü. Assam Rifles sepaitem den police temi Sekul-Lui ayong nung shibenertem aputsü atema tasa asa.

"Ayong nung rong ka aruba sülen sepaitemi iba rong sot aser bushitsüingdamba mapang Myanmar nungi bener aruba automatic rifle ka, magazine ka aser injang 26 nguteta liasü," ta

Assam Rifles-i sangdong ka ajanga metetdaksü.

Aija alisang ana ya Assam Rifles-i Mizoram police nem bendanga agütsüogo.

"Ozüng alema inyaksanshirtem atema iba sentong yagi tetsükdaksü adokdaksüogo. Meita aoba sentong takok anguba ajanga Indo Myanmar arrtsü nung yimjung benoktsü asoshi teyari agütsütsü," ta kasa sangdong ajanga metetdaksü.

## Assam: Treasury dept nung inyaker ka sübokrem agiba atema apu

**Guwahati, Rongjui/September 16 (Agencies):** Assam treasury department nung inyaker kati sübokrem meshia lia puogo.

Iba tatalokba ya Assam kubok Nagaon district nung ataloka liasü.

Iba ken o nung aija alila ya Junior Accounts Assistant Khushbu Harlalka ta jangjaogo.

Lai, constable Nabin Bora nungi sübokrem sen 1000 agizüka lia apu. Bora indang

Government Provident Fund (GPF) sen takaratiba nung agütsüdaksütsü atema iba sübokrem meshia liasü.

"Bora-i kü dang ashiba agi lai sen meshi aser sübokrem tagidak nung la aputsü atema tasa asaa liasü," ta Nagaon SP Anand Mishra-i ashi.

Paisa, "tetsür police ishika la indang office-i uniform mesemi yok, aser parnoki lai constable sang ket nungi sen meshiba tangoka liasü. Iba sülen la apu," ta ashi.

## Arunachal: Longding district nem 'Democracy Award' agütsü



**Itanagar, Rongjui/September 16 (Agencies):** Arunachal Pradesh kubok Longding district nem election kanga mereka agiba atema "State Democracy Award" agütsüogo.

2019 kum assembly aser panchayat election kanga ochi shia aser tebandang kecha makai agiba atema Longding district nem iba naroküm agütsü liasü.

Kasa mapang nung Arunachal Pradesh, West Kameng district kubok Nafra nem Best Performing Sub-Division award agütsüogo.

Item narokümtem ya Arunachal Pradesh Angh - Brig

(Retd) Dr BD Mishra-i Bodhbarnü International Democracy Day amungba mapang agütsü.

Angh Mishra-i ashiba agi, International Democracy Day ya UN charter kubok züngoksema aliba linüktem tsüingda tashishitsü maketba democracy inyaksim benoka inyaksü atema sorkar shilem ajungkettsü nükjiding nung amunger ta ashi.

Mishra-isa, tarak meketi ochi shia tebandang makai election takok nung agiba atema State Election Commission (SEC) nem tenüingsang agütsü liasü.

## Meghalaya nung Bangladesh nung 116 potetogo: Home Minister

**Shillong, Rongjui/September 16 (Agencies):** Meghalaya nung 2018 nungi 2021 kum tashi nung ozüing alema aruba Bangladesh nung 116 potetogo, ta home minister Lahkmen Rymbui-i Brehostibarnü House nung metetdaksü.

MLA Winnerson D Sangma-i ken o ashishiba mapang pai iba telangzüba agütsü liasü.

Rymbui-i House dang ashiba agi, district asem nung Superintendent of Police (Infiltration) amenoka lir. Paisa, state nung ajak senteper infiltration posts 30 lir ta ashi.

Rymbui-isa, tanga state nungi kuli kaket tejangja makai

nüburtem state-i aruba osang metetdaksü aser ashiba agi, bendanger 16,000 dak tema Assam-i meyipa yokogo. Bangladesh nung 116 rongnung 44 tang tepuokdak lir aser 72 meyipa yokogo.

Mawsynram MLA HM Shangpliang-i, Mawsynram constituency kubok Hatmawdon nung infiltration camp ka amenoka aliba indang metetdaksü. Pai ashiba agi, iba camp ya international arrtsü nungi kilometer ishika pilar shishilembadak ka nung amenoka lir.

"Ni DGP dang iba tesem nung aliba police tem mapa shidak minyakba indang osang

agütsüogo aser parnoki khien khien daka alaka bendangertem mepoteter. Infiltration camp amajok nung mamenoki outpost tem amenokba tajungba asütsü ta shidangogo," ta Shangpliang-i ashi.

Paisa, DGP-i iba ken o sorkar dangi abentsü ta ashi. Mawsynram MLA-i ashiba agi, sorkari outpost amenoktsü atema kecha sentong mali ta ashiba angazüka pa kanga süngmanga liasü.

Shangpliang-isa, asükwa mapang Bangladesh nungertem arua Meghalaya nung aliba kozü ajak ongzüka bener aoba indang lemsatapa jenjang tapet agitsü benok.

## Tripura: CPI (M) lenir tejen Gautam Das Covid agi süogo



Gautam Das (File Photo)

**Agartala, Rongjui/September 16 (Agencies):** CPI (M) lenir tejen aser Tripura state committee secretary Gautam Das, Brehostibarnü Covid-19 tashidak agi animesoa timtem balala adoker süogo.

Arishi kum 70 tain Das Covid agi Brehostibar anepdang Kolkata kubok nija

mozüki ka nung süogo.

Pai, kinungtsü Tapati Sen aser jala Swagata Das toktsür iba lima nungi pilaaogo.

Das dak Covid-19 tashi keta aliba August ita tatembangbuba hopta potet aser pa Agartala nung nija mozüki kati temang anepalutsü atema anir ao.

Pa temang tamajungba

akümba sülen September 6 nü Kolkata nung mozüki kati anir ao.

Das ya CPI (M) nung 1968 kum aden aser 1986 kum Tripura state committee züngsem aküm.

Pa 1994 kum state secretariat nung shim aser 2018 kum party secretary kuma liasü.

Das-i, 1979 nungi 2015 tashi party indang osang kaket 'Daily Desher Katha' edited asü aser pa Agartala Press Club ngutetertem rongnung ka liasü.

CPI (M) politburo-i Das'er kinungertem den asükhu lemsatepogo.

"Tripura nung lenla aika nung party amokmerena aliba mapang ka nung pa süogo aser iba ya party asoshi takoksa tulu lir," ta politburo sangdong ka ajanga metetdaksü.

## NLFT telungpur asem bendanga agütsü

**Agartala, Rongjui/September 16 (Agencies):** Tenokdangba agütsür aliba National Liberation Front of Tripura (NLFT) nungi züngsem asem police tem matsüingdang bendanga agütsüogo.

Ken o ashishiba mapang parnoki ashiba agi, chiyongtsü aser sen agi anüingba ajanga parnoki kidanger linük Bangladesh nung amenoka aliba camp nungi jena ao aser bendanga agütsü, ta police sangdong ka ajanga Brehostibarnü metetdaksü.

Telungpur asem ya Alindra Reang (25), Anida Reang (35) aser Drawkumar Reang (30) ta jangjaogo. Parnok asemprongla ya North Tripura district kubok Ananda Bazar

police station temeket nung aliba yimtsüingtem nungi lir.

Parnoki police dang ashiba agi, parnok iba telok nung 2019 kum aden aser Bangladeshi nung amenoker aliba camp nung training agi, ta keddangsur kati ashi.

Parnok state kubok kinük nung aliba tesemtem nung rakzükrakdemba maparen balala nung densema liasü, ta paisa ashi.

"Arem nung kanga timtema aliba aser lenirtem shirnok Bangladesh aser Myanmar nung kanga jangradema alir parnok yimayimpong meshidakba ajanga parnok kanga tezüdangatok," ta keddangsur i ashi.

NLFT ya 1997 kum tenokdangba agütsüogo.



## TIR YIMYIM YIMOBILEM (EDITORIAL)

DIMAPUR ROGONÜ, RONGJUI (SEPTEMBER) 17, 2021

### Chia masü, yia masü !

**A**senok Nagaland nung alirtem ya chia masü aser yia masü ta tetsünga nung asenoki meteta aser memeteti takoksa kanga ngudagi. Item takoksatem rongnung asenoki asen meyong ali rongsen agiteta temoatsü kuma mamshitetba ya ka asütsü. Joko, Nagaland ya India telongjem kubok state kumer kum roker jungdi asur saka tang tashi asenok yimten tebilemstü aliba agi rongsen renlokdahtsüba mapa aika takok ngua meinyaktetter. Item rongnung Nagaland nung totzü agiteta mamshitetba aser bank nung mapa tulu inyaksü asoshi ali lilema yutsür sen maputetba timtem ya asütsü. Asenoki aiben India temzüng arla 371(A) nung Nagaland nung ali aser idakji aliba rongsem madak kiburji government masü saka ali kibur asütsü ta tashi agüja aliba agi, Nagaland merenloktetter amai bilemer aser jembir, ajisüaka asenoki iba timtem adokdakji jungjunga reprangdangra, arla 371(A)ji masü aser ali kiburtema masü saka timtemji asen government aser asenok nübortem lir. Külen asenoki Nagaland kum 60 ajung tashi nunga Nagaland akumba tamendakdak aser tezüngzüktep ken o, koba dang "16 Point Agreement" ta ajar, iba ken o 16 jia junga meyipa reprangshia meinyaktetter aser ano külen Naga yimten nüchiso dak aketba ken o a tatem kati arua mejembitetter, anungji iba ana tsüngdaji asenok chia masü aser yia masü ta kechiar memetet ka kuma odagi. Nagaland tatar senden nung teti jembiba onük ana lir, aji ka senotsü sentong aser kaji, Naga yimten tebilemstü onük latettsüba indang jembir. Atangji, onük anapronglaji kanga tongtibang, saka tezüdangtsü kaji, senotsü sentong indang jembibaji, asen lima nungi rongsen pokteta senotsü akümtsü indang masü saka New Delhi nungi asenok nungdak ajak meshitsü aser angutsü teimla nung jembir. Ano, Naga yimten tebilemstü indang jembiba onükjia shisa tasen ka agüja takoktsü lenmang ka teyur masü saka ken o jembirtemi Naga nungertemi akümketa agizüktettsüsa telatetba kati arura onok mena aliba menden dena aitsütsü mulunga lir ta latetshipet latetshiba asenoki angashir. Jungjunga bilemdangra, shibaibo Naga nung ajaki agizüktettsüsa telemtetba ka bener aru nung ma asütsü? Joko, iba ama chia masü aser yia mekümdaktsütetter ta asüba ken o masü saka Naga nungertemi agizüktettsüsa Naga yimten ken o jembirtemi ken o lemtettsüsa shisatsü agüja yariteptsüla. Joko, alima nung ya, akhidang, long melena yin aser süng melena plastic amshitsü purapitet amato, tanü putu nunga totzü melena süngolio aser anü nungi anguba tashi amshia gari jajatsü tenzüko. Ibaji kodang bilemdangdir, asenok yimten nüchiso angu ataa, ali telong nung aliba totzü magittdaktsü atadang, ashiko, alima nung totzü jenjang ajemadoktsü aser nungdaka mali kümadoktsüa akok. Item ajakji yimsüsürtemi anir nübortemi angatetjema arutsü kanga rongdak nungdaka kumogo. Joko, asenok tatar senden nunga 16 Point Agreement aser India temzüng arla 371 A ya reprangshia o lemtep akatsüla aser kobasa mapa kuma meinyakteti ali, itemji mapa kuma inyaksüla aser ano koba onüksa menüngdaker aser tanü tensa den mapet aser meputep kümadoker, itemji endoktsüla. Aji oda, arla 371 A nung shisema aliba ali rongsentemji kechisa (?) aser ali kiburtem nem tashi agüja alibaji koba tashi ka nung agizüka amshitsü (?) aser state government li mesüaka nübortem ajangzükdaktsütsü atema inyakba mapa nungbo ali madakji koba tashikabo state government-ia tashi amshitsü (?) ta asüba nungdak onüktem benoka jembitsüla aser tanü putu aser Nagaland dak apet temzüng ozüng latettsü tim. Iba ama nungdak ken o tatar senden nung benoka jembir, nübortem nem tashi aser tangatetba agütsüba agi, yimten nüchiso menguaka Naga nung Delhi dak nendaka melii peisasa litettsüsa pei lima nung rongsen poktetdakja inyaktettsü. Asenok tang tashi tangar dak nendaka alitsüsa akumba ya, tangar tai masü saka asenoki asen nem agütsüba tashi memetet aser mamshitetba ajanga lir. Aji oda, asen dak aliba tashi meteta asensasa asenok nokdaktettsüsa litetba anogo nungang asenok yimten nüchiso angutsü ta asenoki bilema, asenokbo shitakba yimten onük jembir tenzüki aser shitakba rongsen bushia asen lima renlokdahtsütsü merangdi.

## OLEMSABANG

### Tenzükba Mapa nung Sodi agiba aser Tebilemstü

~ Narola Lemtur

Tenzükba mapa, talisa Ordained minister, ya taküm piyong Tsüngrem tenzütsü tajaba aser khuret agütsür tenzüka mapa ka lir. Anungji Tsüngrem tenzüka nung sodi mali, saka mapang tatakzük ka toklang tenzüker ka ama tenzüka arur, arogo nung sodi agir. Ao arogo nung tang inyakyim kaji kum 60 nung sodi agütsür. Kari tetsüi asoba kum aser kari certificate nung agüja aliba kum ta agir. Lim arogo telemtetba aser tenzüker tangatetba nung tasoba kumji agir aser yamaji sodi agia arudagi. Anema alir asoshibo 60 ya tashikadang aser "most productive" mapangji lir. Karbo tanur school nung azüngba mapang, karbo tanur kata mapa nung ia maliba mapang ka. Tenzüker aika mapa nung sodi agir pension aser tanga social security kecha mali kanga timatempa angur. Anungji tarutsü nung lanurtem ajangzütsü asoshi tenzüker sodi agiba indang YSS nung jembiba tebilemdangtsü kar lemsateper.

#### Tetsüi tasoba kum, Certificate aser Sodi agiba

Asen Ao lima nung balaka, ordination kanga menurang agütsür, aser 60 nung retire südaktsür .... Mapang tajungdang chiokadoker ta bilemer" - Shilula Imchen

Health tajungerbo kum 60ji ano kanga yakyaka aliba mapang lir. Tang ni telidak kum 90 tema tain ishika lir. Tang tashi parnok rongnung nisung ana-asek katibo sonüi or longmi lepa pa sasa bener adoka atsü atsüteter....Ni shinubaji health agi dang melara kum 70 tashi tenzükbaji ajak asoshi tajung ta kü tebilemba lemsar." - Ayutemjen

50s, 60s aser 70s tashi nung asen lima birth certificate ya bulua mamshi aser mebushi. Aor teimbaka schooli ao tenzükbaji süngpui yirangsa tenzü, tetezü kum 15 shi nungang schooli ao. Ano tsürabur aikati koba kum, ita aser anogo tanur aso aji zülua mayu. Zülua yuaka, Naga nung nüchiso raraba mapang grouping nung mi agi rongdok, kari kumji amadok, aser kar office nung sama. Yamaji employment problem aika maliba mapa kum yanglushia mapa inyaka aru. Ano 60's & 70's mapang tashi ka nung school Headmaster-i antas ka agi kibur dang masüngdangtepi class VI tatidang agütsüdang kumji zulu aser aji aika asoshi official birth certificate akum. Headmasteri par putu nung tajungtiba inyakogo ta bilemer kechiaser sorkar mapai aitsü asoshi age limit lir. Kum ajemer zulu nung dang sorkar mapai aidang tetsükdak malutsü aser kum talangka inyaktettsü ta bilema Headmaster-i temeim mapa inyakba ta angateter.

NBCC aser ABAMI anir Govt. mapa nung asüyonga, arogo mapa nung asüyonga tetsüi tasoba kum agitsüla, Naga lima ochimashi mapa tulutibaji tasoba kum meimchiba ya ta ayimoktsüogo. Saka arogo tenzüker kari angaba dak alaka, Govt. office nung inyaker atema mapa kuma meinyaktet kechiaser certificate nung zülua aliba kumji official document. Employee karibo ni kum ana talila enoka lir saka certificate nung aliba kumji dang agitsü ta odia ashiba lir, ano karibo Headmasteri küdi kena aiblener tasoba kum shitakba kum dang nungi talila enokja lir ta tenujiang tama retire asüba otsü lir. Ibaji tebilemstüji pei nija moral/ethical telemtetba agitsüba dak alaka tashiyim agi institutioni melenshitsütsü makok. Tanü asüngbo tsüraburi birth certificate shitak ayurji, kum 10 tsüngda nungbo tetsüi asoba kum aser certificate kum tebilemstü ya benteta aotsü imlar.

#### Sodi kodang agitsü?

Lokti balala nung lisema arudang tajitetba kaji kodang tenzüker ka office kasa nung kum aika lider arogo/institution/school/mungdang nung jungjunga kibur kumer loktiji pa meyong ama akümdang, lanur tajung aidang ministry nung tetsükdaktsü ajuruba ajangshi arudagi. - Amenla Mar

Lanur employment leman lapoktsü atema retirement agi limit atsüzüker ta asüba yabo kanga dang short-sighted tangatetba ta bilemer. Employment avenues create asütsüba sendong balala porateta inyaksü Tsüngrem dang shisatsü meshitsü nungdak" - Bendanglemla Longkümer

Kibong nung chirnur ano settle masü, ita sen tila, pension aser tanga social security mali, ano shi tamang nung tashikadang kum 60 nung retire sür kechi inyaka alitsü, kechi chia alitsü? Ya tashiyim mapa ka masü no? Nisung karbo ki mali, retire süra pei adianu kidang jenoka aliba ajuruogo. Tsüngrem tenzüker kaji retire süt business tila teri kar inyakdi ta asü nung nübortem telua jembitsür. Ya tebilemstü tulu masü no? Arogo nung tenzüker kaji kum 38 service mesüra 68/70 nung retire sütsü nung nübortem aser teinyaker asoshi tajangzük asütsü.

#### Menua retire masüba tebilemstü

Arogo aika nung retirement kum 65 nungi 70 nungang südaktsüba angur. Tat. agi, India nung Methodist Arogo kum 70 tashi, CSI nung 68 tashi, aser tanga lima aika nung kum 70 nungi 75 tashi nung retire sütsür. Saka tenzüker kum retirement atsülangtsüba nungji tebilemstü aika adoker:

- Tanü lanur aika tazünger adoker, anungji unemployment tali adoktsü
- Temang shi ajemba den, amatari tali, tejen yimya dang benshidi ta asüba aser putu den apet tesayuba magütsüteter
- Kum aika jaka ka nung dang tenzüka ajanga nübortem lakteta akumba

Item tebilemstü ya ajurutsü aser tangaria ajurua arudagi. Süra item tebilemstü atemaji kechi inyaksü?

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Tanur raksaba anema Korea nungeri sarasadem campaign agitsü



South Korea nung Arogo lenirtemi linük nung tanur raksaa indokba anema longkak aitba noksa nung angur.

**September 16, 2021:** South Korea nung Khristantemi, tanur raksaa indokba anentsü atema alima tesem ajungalen anogo 40 nü sarasadem campaign nung parnokia shilem agitsü aser linük nunga tanur raksaa indokba anentsü atema lumia sarasademba dang masü saka nübürtem nem awareness agütsü aser tanur raksaa indokba agency tem den-a ajembitsü, ta metetdaksüogo.

South Korea nung aliba Khristan telok balalai Khristantem dang linük yimtiba, Seoul nung aliba Gyeongui Line Forest Road (Yeontral Park) nung anogo 40 nü sarasademba campaign nung shilem agia dendaktsüner, ta mepishia metetdaksüogo.

Sarasadem campaign ji September 22 nungi October 31 tashi agitsü.

Linük nung tanur raksaa indokba anentsü atema temeja sarasadem ka renemogo aser campaign mapang piyong sarasadem nung shilem agitsü atema Khristantem aser Khristan teloktem nem metetdaksüogo.

Tang linük nung coronavirus wara prokba nokdangtsü atema sorkari tenokdangba

balala benoka aliba ajanga Khristan teloktemi campaign nung shilem agirtem dang telok tilala dang adenshia shilem agitsü aser nisung pilaa alitsü metetdaksü.

Anogo 40 nü sarasadem campaign ya alima tesem ajaklen agiba Khristan campaign ka asütsü. Iba campaign ya Texas nung 2007 küm tentetba 40-Day For Life group-i ayongzüka liasü. Tang linük 63 nungi volunteer million ka dak temai iba campaign pusemer.

Iba campaign ajanga kinü tanur 19,198 shi kümzükogo, tanur raksaa indokba mapa inyaker nisung 221-i tanur raksaa indoktsüba mapa anenogo aser tanur raksaa indokba clinic/facilities 112 shibangogo, ta parnoki metetdaksü.

Taküm June ita nung South Korea nung Committee for Life of Seoul Archdiocese, Pro-Life Medical Association aser Beautiful Picket teloktemi iba campaign pusema linük nunga Khristantemi iba campaign nung shilem agitsü, ta sangdonga liasü.

40-Day For Life group-i ashiba agi, alima nung nisung timtiba asübaji tanur rakaa

indokba ajanga lir, kechiyong alima nung küm shia tanur million 40 shi raksaa indoker.

2018 küm Korea nunga Khristan putirtemi tanur raksaa indokba 'anti-abortion petition' ka tenzüka liasü aser iba petition nungji nisung million ka dak temai sign süa liasü.

Yaküma putirtemi Tir, Moon Jae-in ajurua South Korea nung Constitutional Court-i tanur raksaa indokertem aitsübaji ozüng alema, ta sangdonga den külemi linük nung tanur raksaa indoktsü melaba anema jembia liasü.

South Korea nung Mother and Child Health Act 1953 ozüng kübok tanur raksaa indokbaji ozüng alema aser aibelener tetsüji küm ka tashi tepuokdak ayutsü aser senchi won sen million 2 tashi achitsü akok. Ano tanur raksaa indoktsür medical worker-a küm ana tashi tepuokdak ayutsü akok. Ajisüaka tangbo linük nung tanur raksaa indoktsü melar.

2019 küm agiba survey ka ajanga, South Korea nunger nütsüng shilem 58-i tanur raksaa indoktsü nokdangba ozüng agiendaktsüner, ta bushiteta liasü.



Assam Haflong kübok Heuwangberam Arogo nung lanur 60 nem Social awareness sentong ka 14-16th September anogotem nung katsüogo. Zeme Supportive Mission ABAM aser IOM teyaritap ajanga sentong takok aser temoatsü ngua tembangogo. Zeme Naga Assam nung yim 96 tashi lir parnok asoshi amangbapur temi maneni sarasadem nung yaridaktsüner, ta Rev Asenba Imsong, Coordinator ZSM ajanga lemsatap.

# ANO GO ABEN TSÜNGREM DEN

## Khristan ka mapa

*Saka nai ajak nung teshisadangba liang, timtem aremang, sayutsüngir mapa inyakang, ne tenzüka mapa abensaang. 2 Timoti 4:5*

Pauli Timoti dang Tsüngrem O sayutsü renema alitsü ashi (t.2). Peteri pa shiti azünger dang na atema osang agütsütsü renema alitsü indang ashi. Pauli Khristan shiai mapa pezü asoshi renema alitsü ashi. Mezüngbuba, mapa ajak nung teshisadang liang. O tanga ka nung, "yi agi temesep... saka tanela agi sünga liang" (Efesa 5:18). Teshisadang liang tetezü ochi nung teti renema alitsü indang ashiba. Tanabuba, timtem aremzü kang ta ashi. Timothy sayutsüngi dang timtem ajurutsü ta Pauli ashi (2 Timoti 3:12). Saka odang aremzü kang ta ashi. Tasembuba, sayutsüngir mapa inyakang aser Pezübuba ne tenyaba mapa abensadakjang.

Iba tajungshiba ya Timothy aser sayutsüngirtem atema dang asenoki bilemstü akok saka ibai tanü asenok asoshi lir. Tsüngremi Khristan shia nem teinyaktsü mapa agütsü aser asenoki aji kümdanga aser tamang katetta inyaktsüla. Ibai tila tanurtem den inyaktsü akok mesüra Sunday School tesayur mesüra choir nung atentsü akok. Ajaki pei ataba mapaji sayutsüngir mapa ama inyaktsüla. Iba tetezü town ka nungi town kati, yimtsüng ka nungi yimtsüng kati oa osangtajung sayutsüngir ama sayutsüngitsü ashiba masü. Iba tetezü na taküm ali tashi Khrista ne dak ngudakja alitsü ashir. Ano iba tetezü nai ne tamang kibong nung, medemertem den aser külem mapa inyakerter den lemsateptsü ashir. Ne O tem jagi mekümsüki alirtem parnok taküm teti taküm daki melenshitsü akok.

Oba, Nai kü nem Ne O tangar den lemsateptsü tenzüka mapa agütsü nung Ne tenüng asanger. Amen.

## Laishiba meyipier mongin, Marilyn Laszlo süogo



Marilyn Laszlo

**September 16, 2021:** Marilyn Laszlo ya Laishiba meyipier mongin ka liasü; taoba hopta Valparaiso, Indiana nung la süogo; la arrshi küm 88 liasü.

Missionary aser Laishiba meyipier, Marilyn ya tamang nung takang liasü aser otsü ashir mongin ka liasü. La küm 24 tashi Papua New Guinea kübok Hauna yimyak liasü; yangji lai Sepik Iwam nunger atema Laishiba meyiptsü. Tamasabo lai sümomo tou nung o zülü tenzüka liasü.

La September 9 nü Alzheimer tashidak agi asüba sülen yimyaklirtemi anogo pongunü la atema mangyimtsü sangdongogo. Parnoki temang nung lishi mezür la atema mangyimtsü aser la nungtem nung sentong aika agitsü.

Küm 50 tejaklen lai Hauna nung ministry mapa tenzü aser iba mapang nungji lai sütsüba Tenla ki ka, school ka aser clinic ka tanü tashi amshidar. Coronavirus wara mapang tashi nung lar aianu aser ministry partner, Shirley Killosky-ibo Hauna yimyaklirtem tenzüka aruogo.

Wycliffe Bible Translators

Tir aser CEO, John Chesnut-i, "Marilyn mapatem ajanga Hauna yimyak nung dang masü saka alima tesem aika nung nisung jenti ajungmesor. 1967 küm Wycliffe ajanga la Hauna-i yoka liasü aser tesülen iba ministry nung speaker inyak. Tesüsa 2003 küm lai la indang organization, Laszlo Mission League tenzüka liasü. Tsüngrem nem tenüngsang agütsür, kechiyong tangbo la lai tenzüka arusang Kibuba den lir," ta metetdaksü.

"Tang alima tesem balala nung mission mapa nung nokdaka alir aser missionary tem aika Marilyn taküm otsü ajanga ajungmesoba asütsüa akok," ta Laszlo Mission League nung Tir, Topher Philgreen-i metetdaksü.

1990 küm Laszlo-i Sepik Iwam oshi nung Laishiba ajak meyizüka liasü aser lai mission mapa maneni inyakba sülen la temang tamajungba akümba ajanga 2012 küm ministry mapa nungi anisüngzüka liasü.

La ya Gary, Indiana nung aso aser kibong nung parnok aianu tetsür pezü dang liasü. La Bryan College aser Indiana University nungi graduate asüba sülen high school ka nung tesayur inyak, iba sülen Tsüngrem tajaba meteta Summer Institute of Linguistics nung azüngba sülen ministry mapa nung ajemoka liasü.

La memorial service October 5, 2021 nü Liberty Bible Church, Chesterton, Indiana nung agitsü aser iba sentongji Laszlo Mission League site nung live yoktsü.

**OLONG PAITEP # 5939**

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

<b>TIPIEN</b> 2. Teburtemi tejak nung awaba - (8) 6. T _ _ _ em - (3) 8. Tzüc ayudak - (3) 9. Nüngdakba dang timba - (6) 11. Züina ao - (4) 12. Yangi tzü angur - (5) 14. Tangar dang nungi tali - (4) 16. Senyong masü - (6) 17. Oadokdi - (3) 18. Tzü tarok - (3) 19. Yimtaklir aikati iba ya ki den külemi yanglusemer - (8)	<b>LANGTSÜNGLEN</b> 1. Temejangdak - (6) 3. Nisung ka mapa inyaksü nübo- (4) 4. Azüntsü asoshi mejemba - (6) 5. Tesangwa agütsüba - (5) 7. Tila masü - (4) 10. Tebenjem tetsür chanu - (4) 11. Tekolak nung inok - (4) 12. Tetsüngda - (6) 13. Tangar inyakba ka inyak - (6) 14. Tim masü ta ashi - (5) 15. Asalendong - (4) 16. Tanü dangtsü - (4)
--	---

**OLONG PAITEP # 5938 TELANGZÜBA**

<b>TIPIEN :</b> 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.	<b>LANGTSÜNGLEN :</b> 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.
--	--

**MASK AGI ASHIOKTSÜ :**

**Aokba** : OBA, Oja, Nenoki jembitsüba tetsür den ya ni malitsü, Anungji kena balatsü anogo latetjangno !

**Tsürabur** : Nena tawaang sen paika to intoka sadibato koda asü,kechiba balatsü jembir ?

**Alokba** : Tokorashino,Nenoki tsürabur kibong tajungata, kinkidong toluata, Tetsürlaji tebur kanga jungerata,shiatsüa tajungata ashiba agi ni molunga lidangogo, saka kodang kidangi or la mask agizük, mask agi sempanger aliba ajungaji tepang kisüng dang liasü. Tereprangtsüa tsürang amai,aser chiyungtsüa kenyungi tolulu chiatoker.Anungji nenoki jembitsüji nenok liangma.

**Tsürabur** : O jabaso Alokba !!!!!!!  
**Lilir: I.Kilang,Ajem, Indisen,Dimapur.**

**TANÜBO NAI LANGZÜANG**

Q. Koba küm University Education Commission tenzük?  
A.1928 B.1948 C.1965 D.1982  
\_\_\_\_\_ (Taruba adok nung onoki langzüsü)  
**YASHI ADOK TELANGZÜBA:** Democratic Republic of Congo

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Küna**

(pronoun) kü den la mesüra pa ( two of us)

\* **Küna** külemi ki ka nung alir

**Künep**

(n) anepdang ka (one morning)

\* **Künep** onok ajak adenshir sarasadem mapang ka agia liasü.

**Happy Birthday**

**TENÜNG** - **RENLONG JAMIR.**  
Tasüba anogo - 17th Sept 2019.  
Küm - 2yrs.  
Talidak - Lengrijan, Anited colony, Dimapur.  
Tsüngrem temeim agi jabaso Renlong Jamir tasoba anogo nungi küm ana renteta pa taochi tashi teka agi timtem kecha mali anir arunung, tsürabur aser kinunger ajaki Tsüngrem dang kanga pelasete iba anogo sarasadema amonger. Asen teyanglur kibur Tsüngremi ano jabaso anema arishi talang moajangma.  
- Temeim Oba, Oja, Oya, Obu, Otsü & Kinungertem.

**NAI-A YA METETTER MA?**

Covid-19 wave tasembuba anema raratsü asoshi renemshiba mapang ka nung, scientists temi iba 'virus' yakta putettsü/tendangtsü asoshi tasa tasentem bushitsü merangdar. Tawa, MIT aser Harvard University nung engineer temi 'novel face mask' ka yanglua liasü, koba ajanga iba mask inokertemi parnok temang nung coronavirus ali mali metettsü asoshi 'novel face mask' yagi minute 90 tsüngda tendangtetter. Iba mask nung 'disposable sensors' tilala inoka yanglu aser tanga mask nunga novel face mask inoker amshitettsü, ta tentet ana indang website nung shia lir. "Iba Technology dak sendakba nung, researcher temi 'patent' ka agütsüogo aser item sensor yanglutsü asoshi parnoki company ka den longjemer maparen tenzüksü imlar," ta MIT indang Institute for Medical Engineering and Science (IMES) aser Department of Biological Engineering nung Medical Engineering & Science indang Termeer Professor aser iba study nung senior author, James Collins-i ashi.

**SUDOKU # 5980**

**TELANGZUBA # 5979**

	5	1	6			7	3	9	7	4	1	6	9	5	8	3	2	
7		8			5		2	1	6	2	9	1	8	3	5	4	7	
						4			8	5	3	4	7	2	1	9	6	
	9		5						5	9	7	3	2	8	6	1	4	
	8				1	2	9		3	6	4	7	5	1	2	8	9	
6									1	8	2	9	6	4	7	5	3	
			1	4	2		5		9	3	8	2	1	7	4	6	5	
		2					1	6	4	2	1	6	5	4	9	3	7	8
4	1	5	3	9				2	4	7	5	8	3	6	9	2	1	

**OJANG LUTEP # 5525**

EMEÜNTSGRR :

ONSENTG :

NGAMATETI :

ENAS :

UNGKMOLA :

DANINYAKG :

LEMTEBIBA :

HAKEC :

ALOMATK :

ANGTEMBER :

**OJANG LUTEP TELANGZÜBA # 5524**

**AJEMAJEMA ALIBAJIA JUNGER SAKA JEMPITSU MAPANG NUNG MEJEMPII DOKTSÜRA LENDONG**

**TAN HOPTA ATEMA - KOMA SÜLA ?**

Q. Jammu& Kashmir amato Nagaland state agi Union Territory-ang ana kümtsü nunga koma süla ?

### Gujarat sorkar tasenba nung Minister 24-i tenangzükba agiogo



September 16, 2021 nü Gandhinagar nung Gujarat sorkar tasenba nung minister 24 tenangzükba agiba sülen tangokba noksa nung angur. Noksa nung Gujarat Chief Minister Bhupendra Patel-a angur.

**New Delhi, Rongjui/September 16 (Agencies):** Brihostibarnü Raj Bhavan, Gandhinagar nung Gujarat sorkar tasenba nung party lenir 24-i minister tenangzükba agiogo, parnok rongnung taoba mapang Assembly Speaker inyaksang, Rajendra Trivedi aser taoba mapang state BJP Tir, Jitu Vaghani na densema lir. Taoba Chief Minister, Vijay Rupani-i aniba sorkar nung minister inyaker ka danga maliasü.

Hombarnü Bhupendra Patel-i chief minister menden atema tenangzükba agia liasü. Honibarnü Rupani-i ajungbena Chief Minister menden nungi anenba shidi agütsü aser Amongnü Chief Minister menden atema Patel shima liasü. 2017 küm December ita nung Rupani-i Chief Minister inyaksü atema tenangzükba agia liasü aser pa ano küm ka shi CM inyaksü anünga lia pai CM menden toktsü. Rupani den state BJP in-charge Bhupendra Yadav, Union ministers Purshottam Rupala aser Mansukh Mandaviya na, state cabinets- deputy CM Nitin

Patel, Bhupndrasinh Chudasama aser Pradeepsinh Jadeja nungeria Angh ajurua menden nungi anenba shidi agüja liasü. Brihostibarnü cabinet minister atema tenangzükba agirtemji Rajendra Trivedi, Jitu Vaghani, Rushikesh Patel, Purnesh Modi, Raghavji Patel, Kanubhai Desai, Kiritsinh Rana, Naresh Patel, Pradip Parmar aser Arjunsinh Chauhan nungger liasü. Minister tem tenangzükba agiba sülen nikongdang 4:30 ako nungi Chief Minister Patel leniba nung tang mezüing Council of Ministers senden menogo.

### AAP-i Uttar Pradesh nung electric unit 300 angati agütsütsü nangzük

**New Delhi, Rongjui/September 16 (Agencies):** Sangküm Uttar Pradesh Assembly elections agitsü lia Brihostibarnü Aam Aadmi Party (AAP)-i, taruba UP assembly election nung party-i takok ngura parnoki electric light unit 300 angati agütsütsü aser electric light khen-a methitemi agütsütsü, ta nangzükogo. Uttar Pradesh nung aluyimertem mesüzüka AAP lenir aser Delhi Deputy Chief Minister, Manish Sisodia-i, aluyimertem nem electric light angati agütsütsü ta nangzük. AAP-i Uttar Pradesh nung assembly menden ajak (403) nungi tokteptsü ta sangdongogo.

Tang UP nung electricity saru kanga tasak, ibayongji nüburtemi light bill agütsütsü timtemer. Sisodia-isa, tang UP nung BJP sorkari nüburtem dang light bill agüjang ta tuyur aser magütsüra ozüing alema inyakertem ta ajar, ta metetdaksü. Osangbenertem senden ka nung jembidang Sisodia-i, "Uttar Pradesh nung kibong lakh 38 nem light bill sen aika adoker yokogo aser sorkari parnok dang ozüing alema inyakertem ta ajar. Ni parnok ama nisungtem dang ya ashir, nenoki AAP pusema assembly election agiba sülen state nung onok nem sorkar kumdaksüra onoki

light bill ji shisaa indoktsütsü aser light bill sentsüh ajak atoktsü. Arvind Kejriwal-i ibaji nangzük, ta metetdaksü. UP election nung AAP nungi chief minister candidate ji shiba asütsü, ta asüngdangba langzüdang Sisodia-i, mapang tetemsü nung party-i iba atemaji telemetba agitsü; UP Assembly elections ji Delhi Chief Minister aser AAP national convener Arvind Kejriwal leniba nung tokteptsü, ta metetdaksü. AAP Rajya Sabha MP aser Uttar Pradesh in-charge, Sanjay Singh-ia, Kejriwal-i nangzükba ama inyaker, aser tanü kechisa sangdongogo item ajakji ataloktsütsü, ta metetdaksü.



September 16, 2021 nü New Delhi nung Defence Offices Complex semzükba sentong nung adentsü atema Ato kilonser, Narendra Modi aruba noksa nung angur. Kasa noksa nung Union Defence Minister, Rajnath Singh-a angur.

### India nung ano nisung 30,570 dak Covid putet aser 431 asü

**New Delhi, September 16 (Agencies):** India nung ano nisung 30,570 dak coronavirus putet aser iba tashidak agi ano nisung 431 süogo, ta Brihostibarnü Union Health Ministry-i metetdaksü. Tang tashi nung India nung nisung ajak senteper 33,347,325 dak coronavirus putetogo aser iba tashidak agi nisung ajak senteper 4,43,928 süogo. Tesüiba ghonda 24 tsüingda linük nung coronavirus tashidak timtiba putetba state ji Kerala (17,681) lir, ta Health Ministry-i metetdaksü. Tang India nung coronavirus agi teshirangdakpur 3,42,923 dang

lir, aser ibaji coronavirus caseload nungi shilem 1.05 dang lir. Tesüiba ghonda 24 tsüingda nisung 38,303 anepogo aser tang tashi nung iba tashidak agi shiranger ajak senteper 32,560,474 anepogo. Tang hopta shia coronavirus positive putetba rate ji 1.93% lir aser anogo shia coronavirus positive putetba rate ji 1.94 lir, ta health ministry-i metetdaksü. Tang tashi nung samples crore 54.77 tendangogo. Tesüiba ghonda 24 tsüingda coronavirus vaccine dose lakh 64.51 agütsü aser tang tashi nung vaccine dose ajak senteper crore 76.57 agütsüogo.



September 16, 2021 nü Minister of Petroleum and Natural Gas & Housing and Urban Affairs Hardeep Singh Puri (tiyong)-i "Modi Stole My Mask" kaket sayatsüba noksa nung angur. Iba kaket ya Amit Bagaria (abelen) aser Savid Rodrgues (ajichi) nati zülu.

### SCO senden nung India-i kiralongra aser Afghan atema jembitsü

**New Delhi, September 16 (Agencies):** Dushanbe nung ayongzükba SCO senden nung India-i shilem agitsü atema renemdar aser iba senden nungji India-i kiralongra aser Afghanistan tensa atema jembitsü, ta osang ka ajanga metetdaksü. Iba senden nungji Ato kilonser, Narendra Modi leniba nung ketdangsertemi virtual format ajanga adentsü saka India external affairs minister S Jaishankar bo tsüingdong oa iba senden nungji shilem agia adentsü. Kasa senden nungji China Tir, Xi Jinping aser Pakistan Ato kilonser, Imran Khan nata adentsü. India-i iba senden nungji kiralongra anema raraba, rongsenkettsüing dak sendakba nung amalitepa inyaksü, region nung terenlok mapatem aser Afghanistan tensa atema jembitsü. Taküm June ita nung SCO National Security Advisors senden nung India National Security Advisor, Ajit Doval-i Lashkar-e-Taiba (LeT) aser Jaish-e-Mohammad (JeM) ama Pakistan nung amenoka aliba kiralongrartem anema asalentong yanglur inyaksü benoka liasü. SCO senden nungji Afghanistan-ia shilem agitsü imlar. China aser Pakistan natibo Afghanistan nung Taliban yimsüsüba pusemer, saka India-

ibo repranga dang atadar. India-ibo, Afghanistan sorkar nungji lokti ajak dendaktsütsüla, minorities kümzüktsüla aser tetsür-tanurtem temeden kümzüktsüla, ta ashir. Afghanistan dak sendakba nung SCO senden nung India-i, kiralongratsü atema kiralongrar telok balala nem Afghan li mamshidaktsütsüla, ta ashitsüa akok. SCO senden nung lenirtemi region nung, talisa Afghanistan nung yimtenren aser security tensa, coronavirus wara, SCO ulushitsü, rongsenkettsüing tsütsü amalitep aser regional den international onük balala benoka o lemteptsü. SCO nung züingsem akümiba sülen India atema tan senden ya pezübuba asütsü. 2021 küm SCO küm 20 ajungba aser Tajikistan nüchiso ngur küm 30 ajungbamong nung SCO senden amentsü. SCO senden nung SCO züingsem linüktem, observer linüktem, SCO secretary general, SCO Regional Anti-Terrorist Structure (RATS) executive director, Turkmenistan Tir, Gurbanguly Berdimuhamedow aser tanga tejaokertem adentsü. Iba senden nung lenirtemi tesüiba küm 20 tsüingda SCO-i inyaka aruba mapatem asadangsü aser tarutsü nung maneni amalitepa inyaksü atema o lemteptsü.



Ljubljana, Slovenia nung parliament kima longkak aiterkem adenshiba noksa nung angur. Vaccine anema nokdakertemi Slovenia yimtiba nung parliament kidang flares onlokja liasü. Dokan, service aser mapa inkadak ajak nung covid pass amshitsü lemtetba atema parnok longkak ait.

### China nung nisung billion 1 dak tema nem vaccine agütsüogo

**Beijing, Rongjui/September 16 (Agencies):** China nung nisung billion ka dak tema nem Covid-19 vaccine ajunga agütsüogo, ta national health commission (NHC)-i Brehostibarnü metetdaksü.

Nisung billion 1.01 dak tema nem vaccine agütsüogo, koba tetezü China nunger nütsünyongziük billion 1.4 nungi shilem 70 dak tema nem vaccine dose anaprongla agütsüogo, ta NHC-i ashi.

September 15 nü tashi nung China nung vaccine dose billion 2.16 agütsüogo, ta NHC otongdar Mi Feng-i Beijing nung Brehostibarnü ashi.

China nung vaccine agütsüba sentong ya taoba küm tenzüük aser sorkari yakbang nung inyakertem nem vaccine mezüing agütsütsü telemetba agi.

Covid-19 immunisation sentong tenzüüksü atema state

meyong Sinopharm-i yangluba vaccine ka agütsü atema temelaba agüja liasü.

Iba sülen China nung company aser academic institutes temi yangluba vaccine trok nem temelaba agütsüogo.

China nung tang arishi küm 12 temapurtem nem vaccine agütsütsü melar.

Taküm küm June 20 nü tashi nungbo China-i covid-19 vaccine dose billion ka agütsür liasü. China-i Marchi tatemlen nungi covid vaccine agütsüba sentong kanga kara inyakyonga odar. March 27 nü linük nung nisung million 100 nem vaccine agütsü.

"Vaccine agütsüba jenjang ajungketa April 10 nü nisung million 200 ajung. Maneni vaccine kanga kara agütsüyonga oa May ita nisung million 300 nem vaccine agütsü aser May 23 nü million 7500

ajungba sülen June 19 nü billion ka ajung," ta English broadcaster CGTN sandong ka ajanga metetdaksü.

Vaccine agütsüba sentong kanga takok ngua kara kara inyakyonga aoba ajanga alima nung takar linüktem rongnung China temaba jenjang nung lir.

"Japan aser US nung nütsünyongsük tesadang ka nem dang vaccine ajunga agütsür lir aser kasa mapang nung Britain aser Germany nung shilem 60 ajangogo.

Vaccine agütsüba nung India atsüngzüka lir aser nütsünyongsük shilem 15 nem dang vaccine ajunga agütsür lir.

Beijing nung nisung tain shilem 97 nem vaccine ajunga agütsüogo aser Tianjin nunga i shilem 80 bo vaccine agiogo. Shanghai aser Zhejiang province nunga vaccine agiba rate shilem 80 tajunger dang lir.

### France-i vaccine magiba health worker 3,000 mapa nungi anentsü

**Paris, Rongjui/September 16 (Agencies):** Iba hopta tashi mapang atsükzüksür aliba mapang Covid-19 vaccine magiba atema France nung health worker meyrejang ishika taa magütsüi mapang nungi anentsüogo, ta Health Minister Olivier Veran-i Brehostibarnü ashi.

"Vaccine magi aliba health centre aser clinic nung inyaker 3,000 shi nem yashi osang

agütsüogo," ta Veran-i RTL radio dang ashi. Paisa, parnok aikati vaccine agütsü melena mapa nungi anentsü telemetba-ang agi, ta ashi.

Mapa nungi anentsürtem ya health worker million 2.7 nungi shilem tilaka liasü, ta paisa ashi.

Tir Emmanuel Macron-i, mozüki, retirement home aser fire service nung inyakertem dang September 15 nü tashi nungbo vaccine agütsü mesera

taa magizüki mapa nungi anentsütsü amokmerena liasü.

France indang national public health agency-i taoba hopta, mozüki nung inyakertem shilem 12 aser doctor shilem trok vaccine magi-i aliba asateta liasü.

France nung nütsünyongsük shilem 70 nembo vaccine dose anaprongla agütsüogo, koba alima nung rate timtiba rongnung ka asütsü.



China kübok Sichuan province nung 6.0 magnitude menoknok ka anokba sülen mapa inyakeryemi ki chireper aliba repranga aoba noksa nung angur. Menoknok agi kitem chireptsü aser nisung asem asüba den nisung 60 yirua liasü.

## Yemen nung telungpur aser sorkar sepai 50 asü

**Sana'a, Rongjui/September 16 (Agencies):** Yemen indang central province Al-Bayda nung telungpur aser sorkar sepai na khatepba sülen tongtimbang ketdangsürtem densema nisung 50 süogo, ta military source kati AFP dang Brehostibarnü ashi.

"Al-Bayda ditrikt nung Huthi telungpurtem den khatepba mapang taoba ghonda 24 tsüngda colonel ka densema sepai 19 süogo," ta sorkar ketdatsür kati ashi.

"Raraba tesem nung aser tayimtsü agi amakba mapang telungpura nisung semer süogo," ta kasa sangdong ajanga metetdaksü.

Huthi telungpurtemi parnok sepaitem asüba indang osang mesangdonger saka tanga military source balala ajanga-iba osang jangjashitsüogo.

Iran-i teyari agütsüba telungpurtemi linük anütoktiplen tongtimbang yimti Marib aziüktsü merangba mapang hopta tsüngda Al-Bayda province amak tenzüük.

February ita nungi tenzüka

parnoki Marib yimti atsüngtsü meranga arudar, koba sorkar asoshi anütoktiplen tatembangbuba tamendakdak lir. Iba rara nung telok anaprongla nungi sepai aika süogo.

Totzü kanga adokba province amokbangba ajanga yimjung asoshi sensaksemtsü atema Huthi telungpur jenjang junga akümtsü.

Marib atsüngtsü atema raraba ajanga Yemen nunger aika linük nung tesem balalai jenshiaogo aser iba ajanga humanitarian catastrophe ka adoktsü ta tsüba bilemer.

2014 küm Huthi telungpurtemi linük yimtiba Sanaa atsüngba sülen Yemen nung mangatettep adok aser iba ajanga Saudi-i aniba teloki alimai agizüker aliba sorkar nem teyari agütsütsüsa aküm.

Rara tenzüker nisung meyrejang aika tepsetogo aser nisung million aika ayawara agi kongshitsü ana nung lir, koba United Nations-i ashiba agi alima nung humanitarian crisis tamajungtiba asütsü.

### UN envoy-i Afghan interior minister den ajurutep



**Kabul, Rongjui/September 16 (Agencies):** UN envoy kati Afghanistan indang interior minister tasenba den ajurutepogo, shiba küm aika alima nung Islamist telungpurtem rongnung aputsü asoshi bushir rongnung ka liasü aser tang sorkar nung züngoksema humanitarian crisis len anitsü asoshi merangdar.

Afghanistan nung UN mission tekolakba Deborah Lyons aser Sirajuddin Haqqani na senden nung teyari agütsüba dak rangloker sensakemogo, ta Taliban otongdar Suhail Shaheen-i Brehostibarnü Twitter ajanga metetdaksü.

"Haqqani-i, UN ketdangsürtemi tetsükdaksü kecha makai Afghan nung nem teyari agütsütetsü ta shiogo," ta pai ashi.

Afghanistan nung mapang talangka sensaktia aser tsüngsarosa tali asüba ajanga timtema arudar, ajisüaka Taliban-i taoba ita sorkar

atsüngba sülen teyari maparen nung tetsükdaksü adokba aser iba den sorkar tenzükertem aser teyari agütsürtem nisung meyrejang aika linük toktsü aoba ajanga tensa tamajungba küma odar.

UN Secretary-General Antonio Guterres-i iba hopta international aid conference nung ashiba agi, Afghan nungertem tang timtem tulu nung lir.

Afghanistan nung UN mission-i ashiba agi, Bodhbarnü senden nung Lyons-i, Afghanistan nung UN aser humanitarian personnel tem amokmeren kecha melei mesera tetsükdaksü kecha makai Afghan nungertem atema mapa inyakdangsütsüla, ta shiogo.

Küm 20 US-i aniba telok den raraba mapang Taliban-i United Nations kübok inyakertem maka aruogo. Parnoki 2009 küm Kabul nung guest house ka maka UN foreign staff pongu tepset.

## Noklak nung Scholarship Scheme atema sentong ka agi



Noklak, Rongjui/September 16, 2021: DC Conference Hall, Noklak nung Scholarship Scheme atema sentong ka ayonga agiba mapang tangokba noksa ka yangi angur.

**Noklak, Rongjui/September 16, 2021 (TYO):** Brehostibarnü, DC Conference Hall, Noklak nung Scholarship Scheme dak sendakba nung sensitization sentong ka agia liasü, ta sangdong ajanga metetdaksü.

Iba sentong nung, Noklak DC, Hiazu Meru-i, asenok Information Technology putu ka nung alir aser asenoki inyakba maparen system ajak 'Information Technology' nung ajemdaker inyaker. Anungji, asenok ajak - tongtibangsa tesayurtemi Information Technology meteta iba den jangyumedema aotsüla aser asenok meküta atalokbatem meteta rajema alitsü nungdaker; aser tasa tasen amshitsüla, ta tetuyuba agütsü.

Noklak district nung rongsenketzung tsütsü tayongzükba jenti ajangshia aruba nung ajemdaker, Meru-i, District nung kaketshirtem atema iba ya tongtibang scheme ka lir, ta ashi.

Tsurabur aser kaketshir aikati item scheme indang mejangjai alitsü akok, anungji temsüa alir (scholarship angutsüpur kaketshirtem) kaketshirtem dang iba scheme indang metetdaksütsüla, ta tesayurtem dang pai mepishia liasü.

DC, Hiazu Meru-isa tesayurtem dang scholarship scheme atema apply asüba mapang asalentong yanglutsü aser tali yakyaka inyaktsü aser

mapang shitak nung temsüa alir kaketshirtem indang scholarship upload asütsü asoshi ajungshiogo.

Iba ama seminar kanga dang tongtibang aser training agir ajak iba seminar ajanga ajangzüksü aser maparen nung nungittsü imlar, ta Meru-i lemsatep.

UDA (Scholarship) Jangsemba Tzudir-i, Scholarship dak sendakba "Guidelines & Criteria" nung ajemdaker jembia liasü.

Minority aser schedule tribe nung züngoka alir class IX & X kaketshirtem atema scholarship, pre-matric scholarship scheme tem nükjidong ya tsurabur tem dang pei tanurtem maneni school züngdaksütsü, school education tsütsü tsuraburtem senotsü timtem punghadaksütsü aser kaketshirtem kaket shisatsü bushiba wadang tsütsü school tembanga züngdaksütsüsa nungittsü atema lir, ta pai metetdaksü.

Tzudir-i, networking system, Banking aser Aadhaar cards indang nung jembia liasü, kong item dak sendakba inyakyim ajak online aser digital dang lir, ta metetdaksü.

Paisa, scholarship atema tenüng (temsüa alir kaketshirtem) agütsüba mapang, 'teinyaksüla' aser 'meinyaksüla' (dos and don'ts) indang telok dang metetdakja liasü.

Scholarship scheme atema

temsüa alir kaketshir tenüng ajak zülüoktsü asoshi pai institutional Nodal officer tem ajungshiogo.

Special Educator, Zurhetho Nyuthe-i, Powerpoint presentation ka ajanga, kaketshirtem (fresh aser renewals anaprongla) atema online sabang ajanga scholarship apply asütsü asoshi inyakyimtem telok dang rasa ashi.

Temsüa alir kaketshirtem atema online nung scholarship apply masüdag, form nung agüja aliba tetuyuba ajak nung junga azüngtsü asoshi, training agirtem dang pai tetuyuba agütsü.

Iba dak sendakba nung, Zurhetho Nyuthe-isa, Class IX & X nung azünger Minority kaketshirtem atema Pre-matric scholarship scheme aser Scheduled Tribe kaketshirtem atema atema Pre-matric scholarship indang metetdaksü.

Iba sentong nung Sub-Divisional Education Officer W.Nzanbemo Humtsoe menden liasü aser Sub-inspector of School, Noklak B.Ngon-i tepela anküp o jembia.

Maneni, SDEO Office, Noklak ajanga seminar ayongzük, koba Directorate of School Education ajanga nungitta liasü. Iba training nung, Noklak District kübok sorkar aser nija school nungi tesayur 44 denogo, ta kasa sangdong nung shia lir.

## NBSE-i online gaming indang metetdaksü

**Dimapur, Rongjui/September 16 (TYO):** Department of School Education & Literacy, Ministry of Education, Government of India tetuyuba dak ajemdaker Nagaland Board of School Education-i, NBSE kübok züngoksema aliba school tekolak ajak dang, kaketshirtem online game asaya addict aküm ajanga tetsükdaksü adokdaksüba indang kümdanga meita atatsü metetdaksüogo.

Online game ya PCs, consoles aser mobile devices amala gaming platform mashi

ka nung angutsü. Online ajanga game tem ya Phone mesera tablet ajanga asayateter, koba online game addict akümba tera lir, kechiyong tanurtemi mashi mapang aser tesem ka nung game asayateter aser iba ajanga parnok school mapa aser lokti nung libaliro dak kongshir.

Iba den bendenloksema wara pokteter school tem shibangba ajanga tanurtem mobile aser internet tali amshir.

Online games asayaba ajanga asayar ka addict akümer, koba gaming disorder ta züngshir. Tenokdangba

kecha makai online game asayaba ajanga nisung ka addict akümer aser iba sülen gaming disorder poteter.

Anungji institution tekolaktem dang online game asayaba ajanga timtem adokdaksüba indang tesayur aser tsurapurtem nem metetdaksütsü atema mepeshia metetdaksüogo. Tebilemtsü kar adokra National Helpline <https://cybercrime.gov.in/Webform/Helpline.aspx> nem osang agütsütettsü, ta kasa sangdong ajanga metetdaksü.



**LONGPA BAPTIST AROGOTSÜR QUASQUICENTENNIAL RANGLOK Dimapur Longpatsür Telongjem Tanela Nung Asentenshi Sentep Sentong**

**Tayonger : Longpa Arogotsür**  
**Anogo : 18<sup>th</sup> September 2021**  
**Mapang : 10:00 am to 1:00 pm**  
**Tesentepdak : Dimapur Longpa Senso Ki, Duncan Basti**  
**O jembir : Mrs. Imtijungla**

### METETDAKTSÜR

- Iba sentong nung Dimapur nung aliba Longpatsür ajak arua adentsü kanga mepishia metetdaksür.
- DLT-i 18<sup>th</sup> September anogo nung asentenshi sentep metenzük dang 8:30 to 9:30 fasting agitsü renema lir. Anungji yimtsür ajak-i arua iba sentep nung shilem agitsü asoshi mepishia ayongzük.

**Lenir:- 1. Putila, Lengri 2. Longeryangla, Duncan**

**Sd/- President Chubala**

**Sd/- Secretary Imnainla Nokdy**

### Office of the Yimyu Ward Council Mokokchung

Mokokchung, Nagaland

### KHU-KHUA AITSÜR

September 14th 2021 anogo Yimyu Ward litsü nung meimchir libaliro yimya dak maketba, taochi makai Watsü Easter Phom, tepseter anguba tatalokba asoshi Yimyu Ward Council-i khu-khua aitsür. Aser iba tebushidangba aser ketdangsuba mapa ya pangdak dang taroktiba nung bushitsüngdangtsü aser aibelener nem tapet temerenshi agütsütsü akhanger. Iba den Yimyu yimden-i tatem tashi bushia tapet temerenshi alitsü ta sangdonger.

**Sd/- Bendangwati Chairman**

**Sd/- Tako Longkumer Secretary**

## MGNREGS kübok Phek nung Public Hearing agiogo

**Dimapur, Rongjui/September 16 (TYO):** Paisa, nüburtem aser MGNREGS, Phek kübok Society for Training and Research on Rural Development Social Audit Unit Nagaland 'Social Audit District level Public Hearing, September 14 nü DRDA conference hall nung agiogo.

Iba sentong ya DPC/PD, MGNREGA, Razukhru D. Vasa lenisüba nung agi. Pai, tarutsü nung tebilemtsü kecha madoktsü atema senotsü shidak amshitsü aser record

## Phek DC-i senzusenpong masütsü metetdaksür

**Dimapur, Rongjui/September 16 (TYO):** Phek, Deputy Commissioner Razouvolie Dozo-i sangdong ka ajanga, nüburtem teküzmükba kübok toktsütsü nükjidong nung tang 2-Lane (Existing Km 45+700 to Km 51+200) lenmang yanglua aliba nung September 15 nungi 24 tashi aonung 10 ako nungi anepdang 5 ako tashi senzusenpong masütsü senzusenpong masütsü metetdaksüogo.

## Noklak jila nung expire osettem asadanga ao

**Dimapur, Rongjui/September 16 (TYO):** Expire osettem meita aoba mapang ketdangsurtemi sen District Administration, Police, lakh aika alang oset pua raksaa TRPO volunteers aser kiyong intokogo. Ketdangsurtemi iba balala ketdangsurtem longjemer amala oset ayokba dokan September 15 nü Noklak jila kiburtem dang tangser nungi nung expire sür aliba oset yokya expire oset mayoktsü alibatem meita ago. tekümdangtsü metetdaksüogo.

## CL: Real Madrid-i Inter Milan kokogo



Milan, Rongjui/September 16, 2021: Champions League - Group D nung Inter Milan aser Real Madrid na asayaba mapang, Rodrygo-i (tiyong) Real Madrid atema goal ka idaktsür sülen, külem asayar Eduardo Camavinga (abilen) aser Nacho (achiji) na den pelatepba noksa nung angur.

**Milan, Rongjui/September 16, 2021 (Agencies):** UEFA Champions League asayamung nung Real Madrid-i goal 1-0 agi Inter Milan kokogo. Madrid nungi substitute Rodrygo-i iba asaya atemtsü lia minute 89buba nung goal ka inokja par teloki Milan tsükdaktsü. Milan puri maongka aika tepdokba yong Madrid-i asaya amokbangadok.

Telok ana tsüingda team kati danga goal meinoktsüteti arur asaya atemtsü lia, Real Madrid nungi külem asayar Eduardo Camavinga ajanga yokba ball Brazil nung Rodrygo-i agizüka goal idaktsü. Group D nung Carlo Ancelotti'er teloki (Madrid) team tajung ka madak takok anguba den group nung temaba jenjang tongtetogo.

## CL: Liverpool-i goal 3-2 agi AC Milan kokogo

**Liverpool, Rongjui/September 16, 2021 (Agencies):** Anfield kübok Champions League Group B asaya nung Liverpool-i goal 3-2 agi AC Milan tsükdaktsü. Liverpool-i iba asaya koktettsü atema Captain Jordan Henderson-i telok atema goal tasembuba bendenloktsü.

Iba asaya tanabuba half nung telok anapronglai goal 2-2 agütsür alidang, Henderson-i minute 69buba nung goal ka idakja liasü. Taoba Champions League nung team anaprongla final ana nung asayadanga lir.

2005 küm Istanbul kübok Champions League final asayaba mapang, Liverpool-i penalty nung AC Milan tsükdaktsü, koba Champions League final rongnung asaya tajungtiba ka ama alimai züngshir. Iba sülen küm ka lir 2007 kasa asayamung final nung Milan-i Liverpool tsükdaktsü.

Telok anapronglai Champions League khen khen

"Iba takok kanga dang tongtibang. Asaya tasak aser tebenja liasü. Asayartemi mekümdangi aibelena asaya yongjia onoki takok nguogo. Iba team-i tebilemba tajung nung asayaago," ta Ancelotti-i ashi.

"Timtema asayatsü ta team puri metetta aküm aser imlaa ataba ama timtema asayaago; aser ni parnok dak iba tangatetba jagi yariogo. Iba team dak asayatsü sempet dang masü, saka parnok dak bendanga agütsür asayaba tanela lir aser ajak dang ibaji tongtibangtiba," ta pai ashi.

Asaya shilem timbaka amokbanga toktepa arur sülen, tamakok anguba ya Inter Milan atema tesusatsü ka asütsü. Asaya ayonger Milan teloki goal kar idaktsütsü maongka angu,

takok ngur külen nungi final metongteti shilem agia aru aser 2019 küm Liverpool-i iba asayamung final takok angu. Tenetben takok angur telok AC Milan-i küm tenet nung taküm Champions League tetoktepa nung mezüing shilem agir asütsü.

Ita 18 sülen, Anfield stadium nung Champions League atema tereprangertem mezüing mezüing aruagi asaya repringogo.

Iba asaya tetenzüklen, minute 9buba nung Milan nungi Fikayo Tomori-i par telok indang nung goal ka inoktsüba sülen, Liverpool-i asaya amokbangtsü ama tasa amshi tenzük.

Ajisüaka, Mohamed Salah-i tongtibang penalty ka metsüpetba densema Liverpool pur tera süngjemadokba sülen, mezüing half atemtsü lia Milan puri mapang tatsüka tsüingda goal ana shi atonga idaktsü.

Minute 42buba aser 44buba

saka goalkeeper Thibaut Courtois-i goal ajunga nokdangtet.

Group D nung Moldovans Sheriff Tiraspol tesülen Real pur tanabuba jenjang nung lir. Kasa group asaya tanga ka nung Tiraspol-i goal 2-0 agi Shakhtar Donetsk tsükdaktsü aser taruba asaya atema parnok Madrid-i aotsü. Ano külen, Shakhtar aser Inter na Ukraine nung asayadang pei pei club atema mezüing point angutsü asoshi tokteptsü.

"Iba group nung Real aser Inter tsüingda asaya ajaki sapua repringogo, saka iba asaya akoktsü asoshi onoki maongka angu. Sheriff-i Shakhtar madak takok angutsü ta shingaia meimla. Teti nunga kümdanga alitsüla," ta Amazon Prime dang Ancelotti-i ashi.

Taoba season nunga Group ka nung külemi asayar sülen Inter aser Real naprongla meneptepa atu. Iba mapang Real Madrid puri Milan madak anaben takok angu aser team anaprongla iba European campaign nung coach tasen Real nung Ancelotti aser Inter nung Simone Inzaghi nati anir asaya liasü.

"Onoki iba asaya akoktsü imlaa liasü, saka nai goal magütsürs asaya akoktsü tasak," ta Inter Milan nungi Eden Dzeko-i ashi.

"Goal idaktsütsü onoki maongka tajung nguogo. Courtois-i kanga junga asaya aser iba ama asaya tamakok anguba ya tesusatsüka," ta Dzeko-i shisem.

nung Ante Rebic aser Brahim Diaz nati goal ka ka idaktsür sülen Milan pur goal 2-1 agi Liverpool tejakdang ser asaya mezüing half tembang.

Tanabuba half tenzükler sülen, Liverpool-ia telangzüba agüja goal ka idaktsü. Penalty metsüpetsang Salah-i minute 49buba nung goal ka idaktsü.

Goal 2-2 kümer aliba mapang, Anfield nung tereprangertemi kodanga mamatetsüsa, Henderson-i Liverpool atema goal tasembuba idakja liasü.

"Mezüing half nung ghonda tesadangka shi, onoki Milan pur koktetta asayaago. Iba sülen, onoki kanga dang anüalema asaya aser taoba ama junga masayatet," ta Liverpool nungi left back asayar Andy Robertson-i ashi.

Liverpool aser AC Milan asayaba mapang, Milan nung Zlatan Ibrahimovic medeni asayaago aser Champions League nung mezüing asayar timbaka liasü.

## India aser New Zealand na asayamung atsülanger

**New Delhi, Rongjui/September 16, 2021 (Agencies):** Taküm

asayamung balala nung asayatsü sentong renemer aliba aser Covid-19 dak sendakba nung mepetmesü jenti adokba yong, India-i New Zealand tour masayatsü lemtet.

New Zealand tour atema India team anogo 14 quarantine' asütsüla, koba World Cup Super League shilem ama New Zealand team den ODIs asem asayatsü renemer liasü.

New Zealand Cricket (NZC) nungi otongdar kati Stuff dang, T20 World Cup temer sülen, India indang asayatem taruba küm Australia nung ayongzütsü, ta osang agütsü.

Ajisüaka, taküm November ita Test ana aser T20s asem atema New Zealand team pur India arutsü terenemba lir.

Sangküm March aser April tsüingda Women's World Cup nung team tenet dak asayaba dak alia, New Zealand-i ayonga

Bangladesh, The Netherlands aser South Africa den asayatsü sentong lir.

Bangladesh aser South Africa team den Tests asayamung ya World Test Championship shilem ama asayatsü.

"Asayartem asayamung balala nung shilem agir arurtem asoshi bilemstsütsüla aser parnok pei pei talidaki shilanger anisüingzütsü atema asenoki parnok nem mapang peria agütsütsüla," ta NZC chief executive David White-i ashi.

Yisu asoba benjongmung (Christmas) matongdang, Black Caps pur India nungi shilangba sülen, parnok ajak anogo 14 managed isolation & quarantine (MIQ) asütsü. Iba quarantine' tetuyuba nung anidaktsüsa akümba ajanga December 26 nü NZC puri Boxing Day Test mayongzüktettsü aser December 28 nü nungi Bangladesh den asaya tenzütsü akok.

## T20 World Cup sülen captain mapa toktsütsü: Kohli

**New Delhi, Rongjui/September 16, 2021 (Agencies):** October aser

November 2021 nung United Arab Emirates kübok ayonga asayatsü aliba T20 World Cup temer sülen, India indang T20I captain nungi anentsü, ta Brehostibarnü sangdong ka ajanga Virat Kohli-i metetdakttsü.

Arishi küm 32 tain Kohli-i social media sabang ajanga India T20 captain mapa toktsütsü lemtetba osang sangokja liasü.

India nung batsman takotet, Kohli-i ashiba agi, Tests aser ODI cricket tsütsü India atema maneni captain inyakttsü.

India tebur cricket Head coach, Ravi Shastri aser Rohit Sharma densema külem team pur den sensaksemba sülen, T20 captain mapa toktsütsü lemtet, ta Virat Kohli-i ashi.

Board of Control for Cricket in India (BCCI) president Sourav Ganguly aser secretary Jay Shah naprongla dang kü telemtetba metetdakttsüogo, ta Kohli-i shisem.

Kohli-i, mapa aika takok ngua achaayangtsü timtem adokba yong T20I captain nungi anentsüsa akümer, ta metetdakttsü.

"India tenüing nungi dang masü, saka tiaka kü dak aketba sempet tajungtiba amshia

captain ka ama Indian Cricket Team anir asayatsü maongka angu. Indian Cricket Team indang Captain ka ama inyaka arudang, shirnokisa nungitta yariogo nenok ajak dang pelar. Team nung külem asayartem, support staff, selection committee, coach aser onoki takok angutsü asoshi India nung kwinakati sarasadem nung nungitogo, nenok teyari ajanga tanü ni iba jenjang nung nokdaktetta lir," ta Kohli-i lemsatep.

"Maparen angateta inyakttsü kanga tongtibang aser tesüiba küm 8-9 nungi format asempronlga nung asaya aser tesüiba küm 5-6 nungi maneni captain inyaka aruba asadanga, Test aser ODI Cricket nung India Team anir asayatsü asoshi nübo aser mapang peria agütsütsüla ta ni bilemer. T20 Captain inyakba mapang Team atema, kü dak aketba sempet tajungtiba amshia inyakogo aser T20 Team atema batsman ka ama Team tejakleni anir aotsü asoshi ni maneni inyakttsü," ta Kohli-i ashi.

Aruya aliba T20 World Cup sülen, Kohli melena India indang T20I captain shimtsü asoshi asayar ka shimtsü asoshi tebilemstsü adoktsü akok, saka Kohli-i melen India team anitsüsa Rohit Sharma captain tetemjen asütsü.

## BILEMDANGANG

"Rongsen meimeribo pei ayak sen yong yokdoker."